

Betico Croes:

ARUBA POR CONTA CU CUERPO POLICIAL PROFESIONAL

Despues di Status Aparte

ORANJESTAD (AAN)

Den un entrevista cu DIARIO a sostene cu Betico Croes encuanto e supuesto inseguridad cu ta reina den Cuerpo Policial pa loque ta trata e posicion di e cuerpo aki despues di Status Aparte, e lider di MEP a declara cu el a tuma nota di e agentenan cu a pidi traslado pa otro isla na momento cu Aruba dreña su Status Aparte. Ariba e punto aki

Sr. Croes a enfatiza cu prome cu tur otro cos lo reuni cu e agentenan cu a pidi traslado pa splica nan con e situacion lo ta y pa muestra nan cu no mester tin ningun clase di temor pa nan posicion profesional despues di Status Aparte.

En todo caso, Sr Croes a garantiza cu pueblo di Aruba por ta tranquilo cu despues di Status Aparte Aruba lo conta cu un

aparato policial profesional, apolitico y cu un solo mision: e seguridad di cada miembro di comunidad y e respet pa cada un su derechonan como ciudadano.

Si acaso bira necesario, Betico Croes a enfatiza cu Aruba lo acerca Hulanda den e plan di ayudo pa desarrollo pa asistencia ariba e tereno aki, den e forma di agentenan profesional cu lo por bin pa un periodo di transi-

cion, mientras cu ta prepara un cuerpo policial cu mistica y amor pa nan profesion, y lo mas aleja posible di politicia, cu no ta compatible cu e trabao di polis.

E asistencia aki por ta den forma di agentenan policial Hulandes pa un periodo transitorio, y tambe pa e puestonan cu ta requieri di hopi preparacion y profesionalismo den e rangonan mas halto di e Cuerpo.

Betico a asegura na DIARIO cu tur intento lo ser haci pa convence esnan cu a pidi traslado pa

motibo di cualquier inseguridad den nan trabao, cu e Cuerpo futuro di Aruba lo ta uno estrictamente profesional. Si bira necesario, sinembargo, pa trece agentenan di Hulanda den e cuadro di ayudo pa desarrollo, esaki lo ser haci ariba un base transitorio, cu enfasis ariba e alto oficialnan cu tin mester pa estructure un cuerpo totalmente capacitado pa garantiza pueblo di Aruba e maximo seguridad pa nan derechonan como ciudadano, y pa nan integridad personal. cuer

CARTA PA TRAHARDONAN DI GOBIERNO FIRMA A CREA SITUACION MAS EXPLOSIVO

ORANJESTAD(AAN)—

Masha indignacion tabata tin ayera den seno di ambtenaarnan y obreronan cu ta traha na gobierno encuanto un circulario cu Bestuurscollege a manda pa nan firma, mustRANDO cu nan ta aproba e rebaho di salario.

Straño tur hende a haya cu e carta ta menciona cu si den un siman e formulario firma no wordo entrega ta ser acepta e ora ey cu e ambtenaar of obrero ta aproba e rebaho.

E comision di SEPA/GABA, yama Comision Info. Obreril den un comunicado a muestra ayera cu e formulacion di e carta aki ta un intimidacion, y cu e ta forma un desprecio pa opinion liber y cu e obregonan, arbeiders y losse dienst, werksterman y esnan cu contrato, e arbeidscontractantnan no ta haya espacio pa nenga y hasta apelacion a ser haci pa actua contra e clase di opresion aki, manera e comision ta califica e carta.

Ambtenaarnan si no a haya e carta aki di Bestuurscollege, mientras cu e rebaho di 10 porciento a dreña na vigor pa nan ayera caba.

E carta ta bisa cu en conexcion cu e situacion financiero economico precario di territorio insular di

Aruba, ta na bienestar general di nos isla pa tuma meidanan drastico ariba tereno financiero economico, manera rebaho di sueldonan y gastonan di sueldo di Territorio Insular.

Relaciona cu esaki, a ser dicensi pa entreante prome di maart 85 baha sueldonan di ambtenaarnan di Eiland y entrante 5 di maart baha sueldo di obreronan cu 10 porciento y un apelacion ta ser haci

ariba otro personal, e arbeidscontractantnan pa nan aproba tambe un rebaho di nan sueldo.

E carta ta menciona cu Bestuurscollege ta confia cu esnan cu a haya e carta lo tin comprension pa e decision necesario y a invitanan pa firma e copia manda hunto cu e carta, dunando nan aprobacion na e rebaho di sueldo.

E formulario mester ser entrega dentro di un siman na hefe di e servicio y si

Bestuurscollege no ricibi reaccion, ta ser acepta cu e trahador a bay di acuerdo cu e rebaho di sueldo.

E presidente di SEPA sr. Mario Tromp a condena e procedura di gobierno. El a bisa cu e circulario a ser manda especialmente na esnan di menos recurso y, entrada y cu nan mester firma di ta bay di acuerdo.

Presidente di SEPA a laga sa cu e tipo di practica aki ta un practica masha inhumano, un forma pa intimidar trahador y ta

un forma di mas bochoroso pa atrapa no esnan cu entrada mas halto pero simplemente esnan cu no tin trabao fijo, pa busca pa haya e garantia di nan pa Bestuurscollege sigui cu nan forma conoci.

El a haci un apelacion pa ningun di e personanan cu a ricibi e carta, pa firma esaki. E situacion a bira mas explosivo cu e carta cu a ser manda aki pa e arbeiderman, werkster y losse arbeiders y arbeidscontractantnan.

MAS INDIGNACION DEN SENO DI AMBTENAARNAN CU NOMBRAMIENTO DI CONTROLADORNAN NA CASINO

ORANJESTAD(AAN)—

E topico cu ayera atardi tabata circula tur caminda den conversacionnan tabata nombramiento di 4 controladornan nobo pa casinonan, di parti di gobierno di Aruba.

E comentarionan cu tabata ser tendi ta cu gobierno ta papia di retira mas o menos 300 empleado, bini cu tur sorto di medida pa trata na drecha e situacion financiero y sinembargo ta nombra algun campañador di

MEP como controlador di casino.

Por a tende cu na lugar di nombra e personanan aki gobierno por a nombra 4 ambtenaar cu lo ta ariba lista pa wordo retirados.

Por a tende tambe cu e nombramiento di controlador aki ta bini na momento cu tin un stop di personal, (personeels-stop) y tambe paralizacion di promocionnan, pero cu gobierno mes cu ta predica esaki no ta

cumpli y cu ultimo tempo ta hopi nombramiento a tuma lugar.

Den seno di sindicatonan di gobierno tampoco e informacion aki a cay den bon tera y por spera cu lo bini reaccion tambe di nan parti.

Otro comentario tabata cu Sr. Betico Croes mes a caba di declara den conferencia di prensa e siman aki cu Hulanda ta mira cu ariba nos isla ta existi e buena voluntad pa sanea e situacion y pesey Hulanda ta cooperando cu ayudo presupuestario. y

cu mester bini reduccion drastico di e aparato gubernamental, y toch gobierno di Aruba na lugar di reduci ta aumenta e aparato gubernamental cu mas hende y tur esaki ningun momento no ta reflesha tampoco e voluntad cu por tin pa sanea e situacion manera ta ser propaganda.

E personanan aki ta bay gana mas di 2 mil florin pa luna y ademas di esey ta bini otro beneficiarios cu ta haci nan entrada hopi mas halto ainda.